

夫士或言卒死皆不能明戴聖對曰君死未葬曰不祿既葬曰薨又問尸服卒者之上服士曰不祿言卒何也聖又曰夫尸者所以象神也其言卒而不言不祿者通貴賤尸之義也通漢對曰尸象神也故服其服士曰不祿者諱辭也孝子諱死曰卒五經通議云春秋說題辭曰大夫曰卒精輝終也卒之爲言絕於邦也士曰不祿不祿爲言削名章也白虎通曰天子稱崩何別尊卑異王公也崩之爲言惛然僵天下也庶人曰死魂魄去心死之爲言精窮又曰人死謂之喪何言其喪亡不復得見不直言死稱喪者孝子之心不忍言也。○魏明帝詔亭侯以上稱薨夫爵命等級貴賤之序非徒偏制蓋禮關存亡故諸侯大夫既終之稱以薨卒爲別今縣鄉亭侯不幸稱卒非也禮大夫雖食菜不加爵即縣亭侯既受符策茅土名曰列侯非徒食菜之比也於通存亡之制豈得同稱卒耶其亭侯以上當改卒稱薨三府上事博士張敷等追議諸王公大將軍縣亭侯以上有爵士者依諸侯禮皆稱薨關外侯無土銅印當古稱不祿千石六百石下至二百石皆誦臺受拜與古